

Meeqqanut suli atualinngitsunut perorsaanikkut ineriikkiartuutaasunik ulluunerani neqeroorutitut akiliuteqartarneq pillugu Namminersorlutik Oqartussat nalunaarutaat

Meeqqanut suli atualinngitsunut perorsaanikkut ineriikkiartuutaasunik ulluunerani neqerooruteqartarneq pillugu Inatsisartut peqqussutaanni nr. 10-mi, 5. december 2008-meersumi, Inatsisartut peqqussutaatigut nr. 4-kkut, 19. maj 2010-meersukkut allanngortinneqartumi § 28a, imm. 3 naapertorlugu aalajangersarneqarpoq:

Akit

§ 1. Kommunalbestyrelse meeqqanut suli atualinngitsunut perorsaanikkut ineriikkiartuutaasunik ulluunerani neqeroorutitut ukiumi tullermi akigititassanik kingusinnerpaamik novembarimi aalajangersaasassaaq.

Imm. 2. Akit meeqqanut suli atualinngitsunut perorsaanikkut ineriikkiartuutaasunik ulluunerani kommunit neqeroorutaannut aningaasartuutaat akiliisussatitaasullu pineqartup pineqartulluunniit aningaasaqarnikkut atugaat tunngavigalugit aalajangersarneqassapput.

§ 2. Kommunalbestyrelse perorsaanikkut ineriartuutaasunik kommunini ulluunerani neqeroorutitut akinik assigiinngitsunik 0-2-nik ukiulinnut 3-6-inillu ukiulinnut aalajangersaasinnaavoq.

Imm. 2. Meeqqanut suli atualinngitsunut perorsaanikkut ineriikkiartuutaasunik ulluunerani neqerooruteqartarneq pillugu Inatsisartut peqqussutaanni nr. 10-mi, 5. december 2008-meersumi § 31, imm. 3 naapertorlugu sunngiffimmi ingerlataqarnermik aqqissuussineq pillugu Inatsisartut inatsisaata akuerineqarnissaata tungaanut sunngiffimmi ornittakkaniinnermut akinik immikkut aalajangersaasoqarsinnaavoq.

Imm. 3. Kommunalbestyrelse kommunimi illoqarfinnut nunaqarfinnullu atuuttunik akinik assigiinngitsunik aalajangersaasinnaavoq. Taamaattorli illoqarfimmi nunaqarfinmiluunniit ataatsimi sullissiveqarfikkuutaartumik akinik aalajangersaasoqarsinnaanngilaq.

Imm. 4. Kommunalbestyrelse angerlarsimaffimmi paarsisoqarnermut kommunimit aqqissuussaasumut immikkut akinik aalajangersaasinnaavoq.

Imm. 5. Kommunalbestyrelse meeqqanut suli atualinngitsunut perorsaanikkut ineriikkiartuutaasunik kommunimi ulluunerani neqeroorutiniittunut sap.ak. 25 tiimit angullugit affarmik akeqartitsinissamik aalajangersaasinnaavoq.

§ 3. Akit skalat tulliuttut malillugit aalajangersarneqarput:

Ima isertitallit:

Inissamut ataatsimut aningaasartuutit %-ii:

	minnerp. %	annerp. %
149.999 kr.-it angullugit	0	5
150.000 – 174.999 kr.	5	6
175.000 – 199.999 kr.	5	7
200.000 – 224.999 kr.	5	8
225.000 – 249.999 kr.	5	10
250.000 – 274.999 kr.	5	15
275.000 – 299.999 kr.	10	20
300.000 – 324.999 kr.	10	22
325.000 – 349.999 kr.	10	24
350.000 – 374.999 kr.	10	26
375.000 – 399.999 kr.	10	28
400.000 – 424.999 kr.	10	30
425.000 – 449.999 kr.	10	32
450.000 – 474.999 kr.	10	34
475.000 – 499.999 kr.	10	36
500.000 – 549.999 kr.	10	39
550.000 – 599.999 kr.	10	42
600.000 – 649.999 kr.	10	45
650.000 – 699.999 kr.	10	48
700.000 – 749.999 kr.	10	51
750.000 – 799.999 kr.	10	54
800.000 – sinnerlugillu	10	57

§ 4. § 5 naapertorlugu akiliisussaatitaasoq akiliisussaatitaasulluunniit kommunalbestyrelsip § 1, imm. 1 naapertorlugu akinik aalajangersaanerata kinguninngua akit qaffasissusiannik ilisimatinneqassapput.

Akiliisussaatitaaneq

§ 5. Meeqqamik pilersuisuiusut akiliisussaatitaapput, taamaattorli takuuk § 6. Meeqqap pilersorneqarnera inummit inunnilluunniit ataatsimut naliliinikkut meeqqap nalinginnaasumik ulluinnarni pisariaqartitaanik, ilaatigut ineqarnermik, nerisaqarnermik atisaqarnermillu isumaginnittuusunit isumagineqarpoq.

Imm. 2. Angajoqqaajusup aappa pilersuisuiuppat taannalu katissimappat, nalunaarsukkamik inooqateqarpat aappaqarnertulluunniit ittumik inuuppat sivikinnerpaamillu ukiumi ataatsimi aalajangersimasumik inooqateqarsimappat angajoqqaq aappaasorlu, nalunaarsukkamik inooqataasoq aalajangersimasumilluunniit inooqataasoq pilersuisuittut taamatullu akiliisussaatitaasutut isigineqassapput.

Tamakkiisumik ilaannakortumilluunniit akiliunneqarluni inissat

§ 6. Meeqqanut suli atualinngitsunut ulloq unnuarlu paaqqinniffimmut pisortaniilluunniit aaqqissuussamik angajoqqaarsianut inissinneqarsimasunut perorsaanikkut ineriikkiartuutaasunik ulluunerani kommunimit neqeroorutini tamakkiisumik akiliussilluni inissamik innersuussisoqassaaq.

§ 7. Kommunalbestyrelse meeqqanik inuusuttunillu ikiorsiisarneq pillugu inatsisartut peqqussutaanni § 9 naapertorlugu ikiorsiissutini aallartitsinissaq pillugu aalajangiinermut atatillugu aalajangiisinnaavoq meeqqanut suli atualinngitsunut perorsaanikkut ineriikkiartuutaasunik ulluunerani kommunimit neqeroorutini inissamik tamakkiisumik ilaannakortumilluunniit akiliussilluni innersuussisoqassanersoq.

Qatanngutigiinnut akikillisaat

§ 8. Akiliisussaatitaasoq akiliisussaatitaasulluunniit meeqqanut suli atualinngitsunut perorsaanikkut ineriikkiartuutaasunik kommunimit ulluunerani neqeroorutiniittunut sunngiffimmiluunniit ornittakkamiittunut meeqqamit ataatsimit amerlanerusunut akiliissappata meeqqamut angajullermut tamakkiisumik akiliussisoqassaaq meeqqanullu taassuma tullerisaanut tamanut affarmik akiliussisoqassalluni.

Naatsorsuinermi tunngavigisaaq

§ 9. Meeqqanut suli atualinngitsunut perorsaanikkut ineriikkiartuutaasunik ulluunerani neqeroorutiniittut sinermut akiliutit akiliisussaatitaasup akiliisussaatitaasulluunniit ukiumi isertitaqarfusumi qaangiuttumi kingullermi isertitaat akileraaruteqaataasussat tunngavigalugit aalajangersarneqassapput.

Imm. 2. Akiliisussaatitaasup akiliisussaatitaasulluunniit isertitat akileraaruteqaataasussat imm. 1-imi taaneqartut allannguuteqarnerat pillugu kommunalbestyrelsimut nalunaassapput.

Imm. 3. Imm. 1 naapertorlugu kommunalbestyrelse meeqqanut suli atualinngitsunut perorsaanikkut ineriikkiartuutaasunik ulluunerani neqeroorutiniittut sinermut akiliutit allannguissaaq. Tamannali pitinnagu kommunalbestyrelse isertitat akileraaruteqaataasussat imm. 1-imi taaneqartut allannguutaannut uppersaatinik pissarseqqaassaaq. Akiliutit allanngiineq pissaaq qaammat ataaseq sioqqullugu ilimasaarereernikkut qaammatip aallaqqaataanit atuutilersumik.

§ 10. Akiliisussaatitaasoq akiliisussaatitaasulluunniit isertitamik annertuumik allanngorsimanerannik uppersaasiisinnaappata kommunalbestyrelse aalajangiisinnaavoq isertitat akiliutit tunngavigineqartut tassaassat maannakkorpiat isertitat, naleqqiussinikkut ukiumoortumik tamakkiisumik isertitatut naatsorsorneqartut.

Imm. 2. Akileraarusiinermut oqartussaasut siusinnerusukkut isertitanik akileraaruteqaataasussanik aalajangersaasimangippata siumoortumik nalunaarsuineq imaluunniit maannakkorpiat isertitarisartakkat ukioq kaajallallugu isertitarisassatut naatsorsuussanut naleqqussariikkat tunngavigalugit akiliineq pissaaq.

Isertitat pillugit uppersaaneq

§ 11. Meeqqap meeqqanut sulii atualinngitsunut perorsaanikkut ineriikkiartuutaasunik ulluunerani neqeroorutiniilerneranut atatillugu imaluunniit § 5 naapertorlugu kiale akiliisussaatitaanerata allannguuteqarneranut atatillugu akiliisussaatitaasoo akiliisussaatitaasulluunniit kommunalbestyrelsimut isertitat pillugit allakkatigut uppersaassapput.

Imm. 2. Isertitat pillugit uppersaat meeqqap meeqqanut sulii atualinngitsunut perorsaanikkut ineriikkiartuutaasunik ulluunerani neqeroorutiniinnera tamaat akiliisussaatitaasup akiliisussaatitaasulluunniit isertitaannut tunngasut pillugit paasissutissanik kommunalbestyrelsip akileraartarnermut oqartussanit pissarsinnersinnaaneranut piginnaatitsissummik imaqaasaaq.

Imm. 3. Akiliisussaatitaasoo akiliisussaatitaasulluunniit imm. 1-imi taaneqartumik uppersaammik tunniussiumanngippata akiliutit qaffasinnerpaaniitineqassapput. Akit taakku atuutissapput akiliisussaatitaasup akiliisussaatitaasulluunniit isertitat pillugit allakkatigut uppersaasiinissaasa tungaannut, tamatuma kingorna uppersaat tunuliaqutaralugu akit qaammat ataaseq sioqqullugu ilimasaarereernikkut qaammatip ulluisa aallaqqaataannit atuutilersumik aalajangersarneqassapput.

Akiitsoqarneq neqeroorutiniititsiunnaarnerlu

§ 12. Akiliisussaatitaasoo akiliisussaatitaasulluunniit akiliutissaminnut akiitsoqalerpata taannalu imaluunniit taakku akiliinissamik eqqaasineqartaralutik akiitsorisat akilersorneqarnissaat pillugu isumaqatigiissuteqanngippata § 13 naapertorlugu meeraq meeqqanut sulii atualinngitsunut perorsaanikkut ineriikkiartuutaasunik ulluunerani neqeroorummiitikkunnaarneqassaaq.

Imm. 2. Akiitsut ullormit eqqaasitsiffusumit ullut 14-it qaangiutsinnagit akilernerqarpata meeqqanut sulii atualinngitsunut perorsaanikkut ineriikkiartuutaasunik ulluunerani neqeroorutiniititsiunnaarnissamik aalajangiineq atorunnaassaaq.

Imm. 3. Kingusinnerpaamik kommunalbestyrelsip akiitsoqarneq pissutigalugu meeqqap neqeroorummiikkunnaartinneqarnissaa pillugu akiliisussaatitaasumut akiliisussaatitaasulluunniit nalunaarneranut peqatigitillugu tamanna pillugu aalajangiineq isumaginninnermi oqartussaasunut nalunaarutigineqassaaq.

§ 13. Meeqqamik meeqqanut sulii atualinngitsunut perorsaanikkut ineriikkiartuutaasunik ulluunerani neqeroorutiniikkunnaartitsinerit tamarmik qaammammik ataatsimik sioqqutsilluni ilimasaarereernikkut qaammatip ulluisa aallaqqaataannit atuutilersumik pisassapput.

Atuutilersinneqarnera

§ 14. Nalunaarut manna 1. marts 2011-mit atuutilerpoq. Tamatumunnga peqatigitillugu Meeqqanut sulii atualinngitsunut perorsaanikkut ineriikkiartuutaasumik ulluunerani neqeroorutinit akiliuteqartarneq pillugu Namminersorlutik Oqartussat nalunaarutaat nr. 17, 27. november 2009-meersoq atorunnaarsinneqarpoq.

Namminersorlutik Oqartussat, ulloq 4. februar 2011.

Mimi Karlsen

/

Lise Lennert Olsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut